

07 FEB 2003

Azalina-Pilihan Raya

UNIT KHAS PILIHAN RAYA PUTERI BANTU RAMPAS KAWASAN PEMBANGKANG

JITRA, 7 Feb (Bernama) -- Unit Khas Pilihan Raya Puteri Umno (UKP) ditubuhkan dengan tujuan utama menjayakan matlamat Umno dan Barisan Nasional (BN) merampas kembali kawasan-kawasan yang dimenangi pembangkang dalam pilihan raya yang lepas, kata Ketua Puteri Umno, Azalina Othman Said.

Beliau berkata dalam menjayakan UKP, anggota-anggota Puteri harus memahami keperluan untuk terus berjuang mempertahankan negara daripada sebarang ancaman dalaman dan luaran.

"Anggota Puteri akan memikul tanggungjawab sebagai anggota Umno dan memberi sokongan padu kepada kepimpinan parti. Puteri tidak ingin sekadar menjadi penghias dalam dunia politik dan kami ingin menjadi penyambung wawasan dan kesinambungan Umno dalam perjuangannya," katanya semasa berucap pada pelancaran UKP di Dewan Wawasan di sini, hari ini.

UKP peringkat kebangsaan itu dirasmikan oleh Perdana Menteri Datuk Seri Dr Mahathir Mohamad.

Azalina berkata melalui UKP, beliau berharap anggota-anggota Puteri dapat dibekalkan dengan ilmu politik khususnya ilmu pilihan raya.

Beliau berkata pendidikan dan kesedaran ilmu pilihan raya amat relevan bagi membantu melengkapkan anggota Puteri yang telah disandarkan dengan tanggungjawab dan peranan dalam pilihan raya umum akan datang.

Azalina berkata Puteri, walaupun telah diberi peluang menimba pengalaman pilihan raya kecil sejak setahun lepas, berpendapat tuntutan pilihan raya umum adalah lebih mencabar dan berbeza.

Beliau yakin ketua-ketua Puteri negeri, bahagian dan cawangan bersama-sama anggota jawatankuasanya akan diuji dari segi kematangan politik, ketahanan dan kekuatan mental pada pilihan raya umum.

Sambil meminta anggota Puteri membuktikan keupayaan mereka melalui UKP, beliau berkata anggota UKP bertanggungjawab menjaga setiap peti undi di setiap daerah mengundi.

Mereka akan dibekalkan latihan-latihan praktikal dan teori merangkumi isu-isu bilik gerakan, teknologi maklumat, propaganda dan komunikasi, katanya.

-- BERNAMA

MNH NAK